

X milia. *Item*, uno fiorentim, è im prexon per ladro. Risposto, sabado è stà preso in quarantia di apicharlo. Et il principe li parloe dil prior di San Sabastiam, per non far sedition in quello monasterio.

Vene l' orator di Franza, dicendo à letere dil senato di Milan, prega la Signoria fazi, todeschi vano a Mantòia non siano lassati passar. *Item*, pregò, per amor suo, la Signoria provedi a uno domino Nicolò Soranzo, sta con lui, di qualche beneficio; e fo chiamato dentro, e ditoli per il principe, per amor di l' ambador, si scriviera per lui etc.

Da Udene, di sier Antonio Loredan, el cavalier, luogo tenente, 27. Chome doman la raina si parte, va a Codroipo, e poi a Porto Gruer; si lauda molto di la Signoria, si oferisse etc. Poi disse dal re di Hongaria si arà pocho ajuto, e cussì à confermato li oratori yspani. *Item*, par il cardinal, va in Hongaria, il re di romani el vol far retenir. *Item*, aricorda si provedi a Gradischa.

Da Gradischa, di sier Bortolo di Prioli, proveditor, in consonantia. Si provedi de li, et quelli di domino Lazaro Grasso sono pochi, et di 80 restati in 30; el qual domino Lazaro è venuto qui.

Da Brandizo, di sier Filipo Salamon, castellan. Si provedi a quelli provisionati, aliter abandonerano la forteza. *Item*, sier Giacomo Barbaro, olim castellan di Brandizo, scrisse aver tolto certo formento, lui dil suo, havia posto in castello, sì che 0 è restato; et ha speso dil suo, ita che resta creditor grosso di la Signoria nostra.

Di Cutaro, dil proveditor, di 16 novembre. Come à ricevuto nostre di 28 seplembrio, con la scription di Sabastian da Venexia ch' è stà mala compagnia; è venuti senza un soldo, e, si presto non verà danari, si partirano. *Item*, per la letera di 17 octubrio, zercha confortar quello populo, e le provision si farà; à leto la letera etc. *Item*, à ricevuto monition, legnami, e feramenta, e ducati 200 per la fusta, in la qual à speso ducati 360 fin qui; è stà servito di danari, et za mexi 5 $\frac{1}{2}$ la tien armata. Da novo, Feris bei è a Scutari con cavali 50, e fato crida, chi si vol far turchi li vol dar arme e cavali e farli cortegiani, per esserli manchato in Levante
487 gran numero de li soi turchi. *Item*, per causa, sier Antonio Condolmer lo molesta di certe scritture, refuda et prega sia fato in locho suo; manda la poliza di le monition recevute; et per uno prexon, fuzito da li confini di Servia, qual manca zorni 20 de li, à inteso, si dice il re di Hongaria haver roto al turchi, e toltoli tre grandi borge et assa' paexe, e fato gran crudeltà; e andava li corieri dil signor tur-

cho, facendo comandamento a quelli timarati, zoè provisionati, si mettino in hordine, per andar a la volta di Hongaria; e si dice, lo exercito dil re esser a una terra, chiamata Smedro, dil turchi, ch' è fortissima. *Item*, el carabodam, signor di Moldavia, vlacho, haver roto uno fiol dil turchi, era a quella impresa con do sanzachi, e à morti li dicti do sanzachi e il forzo di le gente, e a pena il fiol dil signor seampò. *Item*, in Alexio e altri lochi de' turchi vien conduti assa' gripi corphuati con sal, e li vendeno con danno di le camere de li nostre. *Item*, aricorda si mandi li in colpho qualche galia.

Di Sibinicho, di sier Vetor Bragadim, conte et capetanio, di 5 di l' instante. Aricorda si provedi al pagamento di le guardie di Castel Novo, per non esser possibile satisfarli da quella camera, e li sarà forzo abandonar la forteza; si scusa a Dio e a la Signoria nostra. *Item*, à leto a quelli citadini la nostra di 27 octubrio, di le grandissime provision si fa; tutti ne hanno auto consolation; e prima stevano mal contenti. *Item*, intende per molte vie, grande hoste de' turchi prepararsi a pie' et a cavallo per vegnir a' danni in Dalmatia; farà provision etc.; supplica sia expedito presto el conte Xarcho de qui, et etiam l' orator di la comunità.

Da poi disnar fo conseio di X. Fato per scurtinio provedador al Zonchio, sier Marco Loredan, quondam sier Alvixe, procurator, rimase da molti, tamen secreto il scurtinio; e la matina vene a la Signoria et accettò. *Item*, fo partito il salario havea Zacharia de Antiquis, morto, di ducati..., tra quelli di colegio e altri secretarij. *Item*, fato di ordenarij Enea Carpenio, et, in locho suo, extraordinario uno fiol di Zuan Giacomo, dil conseio di X. *Item*, fato capi di X sier Piero Malipiero, sier Polo Trivixan, sier Polo Pixani, cavalier. Et colegio reduto a consultar di trovar danari. *Item*, alditto el conte Xarcho, aricorda assa' cosse optime in Dalmatia, e sia fato uno proveditor etc. *Item*, fono aldit li merchadanti di oio, dolersi etc.

È da saper, ozi in quarantia civil e criminal fo preso di retegnir, di tutto el conseio, sier Zuan Matio Girardo, quondam sier Francesco, olim camerlengo in Candia, per haver comprà bollete etc. Lo menò sier Lucha Trum, fo synicho; et za 8 zorni etiam prese di retegnir sier Nicolò Zustignan, quondam sier Marim, etiam stato camerlengo in Candia, per il medemo eror.

In questo zorno acadete cossa notanda, che sier Alvise da Canal, quondam sier Bortolo, qual era di pregadi, cadete drio copa di certo pozuol e si disco-